

OIC perlu wajah baru – Abdullah

Daripada SOPHA SULAIMAN

UM - 13/5/2006

JAKARTA 12 Mei - Pertubuhan Persidangan Islam (OIC) perlu diberi wajah baru dengan memberi keutamaan kepada pembangunan ekonomi dan penggunaan sumber kekayaan bagi menjana kekuatan politik ummah.

Perdana Menteri, Datuk Seri Abdullah Ahmad Badawi berkata, tumpuan membangunkan ekonomi itu perlu diberi keutamaan memandangkan majoriti negara miskin adalah anggota OIC.

Beliau yang juga Pengerusi OIC menyatakan, kemiskinan dan buta huruf kini merupakan halangan utama kepada negara-negara Islam untuk menjadikannya negara yang maju.

“Dulu OIC lebih banyak berbincang tentang masalah politik, terutama isu yang membabitkan negara Palestin dan kemudian kita bincang mengenai isu pencerobohan ke atas Iraq, tapi kini kita akan tumpu untuk menguatkan ekonomi,” kata Abdullah.

Perdana Menteri berkata demikian ketika diwawancara oleh stesen televisyen Metro TV di Denpasar, Bali, hari ini.

Abdullah tiba di pulau pelancongan itu malam tadi untuk menghadiri Sidang Kemuncak Kumpulan Lapan Negara Membangun (D-8) Ke-5 yang berlangsung selama tiga hari.

Abdullah menegaskan tanpa kekuatan politik dan ekonomi, kekayaan sumber minyak yang terdapat pada negara anggota OIC, tidak dapat dimanfaatkan sepenuhnya.

“Jika kita tidak mempunyai kemampuan untuk memajukan ekonomi walaupun kaya dengan sumber minyak, ia tidak dapat dijadikan sumber kekuatan yang sebenarnya,” kata Abdullah.

Masalahnya, kata beliau, kelemahan politik negara anggota dan tiada pendirian untuk menjadi maju, membuatkan umat Islam daif walaupun sesebuah negara itu dikurniakan kekayaan sumber minyak terbesar dunia.

“Kita tidak pandai menggunakan sumber kekayaan yang ada (minyak) sebagai strategi yang boleh memberikan kekuatan kepada kita,” katanya.